

# Jü Carta Hebreommeu Jiojteri

## *Dios ä Üusihua bétana nok-la*

**1** <sup>1</sup>Dios juebénasi noksulatukay yún kaa nanäla machisi júnak táapo täbui taahuarimmechi, jume áchayhuarimmehui, profetam huämi. <sup>2</sup>Én ímëi taahuarim chúkula huëpo ä üusihua huämi, itou nok-la. Íkái éntok ä yö yáaka sîmeta ä mámpo tójjak; ániata éntok áapörík béchïbo yáuhuak. <sup>3</sup>Áapo ájária jü bélojkosi sîmek béppa Diosta ujoyória, éntok tua alëbenna sîmeku, sîme ániat ayukamta jíapsitua, sîmeta tútti jípure ä nok úttiärayi. Éntok Áapo mukuka sîmek béppa túlisi itom báksiak, kaa tü yáarim itom úuhuaaka. Huanäi ámani jikat jü tua yörisi machik bátam bétana yejtek.

## *Jü Usiari ángelesim béppa chë yörisi maachi*

<sup>4</sup>Íari béchïbo ángelesim béppa chë yörisi machisi tahuariahuak, éntok bempörim béppa chë yörisi machi téhuam mákhuak, tua Diosta ä üusi béchïbo. <sup>5</sup>Bueituk, ¿jauhueysu Dios jabe ángeltau ínel jiaahuak:

Émpë ín Üusi;  
ínapone én em Áchaytaka  
taahua?

Éntok kétchi:

Ínapone én áa béchïbo  
áchayhuari;  
áapo éntok ín üussitunake.

<sup>6</sup>Éntok kétchi, juka kësam huérita ániau kóm bíttuaka jume ángelesimmeu ínel jiaahua:

Tónommeyem áu jápteka ä yöre.

<sup>7</sup>Jume ángelesim bétana éntok kët ínel jiaahua:

Ä ángelesim jekata bénasi  
johua;

jume nésauta ä joriame éntok  
táij bétemta benamme.

<sup>8</sup>Éntok ä Üusi bétana ínel jiaahua:

Dios yörisi machi bankopo  
káteka, jíbapo béchïbo  
nésahue,

éntok jü kuta em réytaka  
áy nésahueu huitti lútula  
huéeka bíttu.

<sup>9</sup>Juka lútula jíapsihuamtë nákke;  
të juka kaa türík éntoke kujti  
eäke kaa huáatia.

Íari béchïbo Dios enchi áma  
yeu píuhuak.

Jü em Dios éntok musäla  
machisi al-leehuamta enchi  
mákka,

em jáläim béppa.

<sup>10</sup>Entok íkái két nooka:

Empo, Señor, sìmeta naatëpo  
buíatë yáhuak;

jü téhueka junne em  
mámamme yáari.

<sup>11</sup>Íri lütinake, të empo jíbapo  
béchïbo tahuanake;

jü huate éntok súpem bénasi  
moynake.

<sup>12</sup>Entok huépul súpem bénasë  
nat am tóttianake,

éntoke chúkula täbui  
bemela súpem béchïbo am  
nakulianake.

Të empo katë täbuiasi  
tahuanake, entok em  
huásuktiriam katim lütinake.

<sup>13</sup>Bueituk jauhuey taaposu Dios,  
jábe ángeltau ínel jiaahuak:

¿Ímire ín bata bétana yejte,  
jume enchi bej-reka kateme em  
guókim bétuk nee am órëu  
tájtí?

<sup>14</sup>¿Jachum kaa espíritu áusüli,  
jume Diosta tékilpo aneme? Ímëri  
juka jínëurita mabetnakeme bem  
anianakë béchïbom äbo bíttuari.

### *Jü buere jínëuria*

**2** <sup>1</sup>Huäri béchïbo, úttia  
tüisi át suaka itom ä  
bínnaکہhui, juka Diosta noki itom  
jikkajakähui, juka itom súalëu kaa  
koptiä béchïbo. <sup>2</sup>Bueituk jü noki  
ángelesim nokakäu huitti taahuak;  
entok jume Diosta béj-reka ä  
nésauri kaa bem yáakäu, lútula  
éehuäpo júne két bette noki ámet  
chúppuk. <sup>3</sup>¿Jáchisute áma yeu  
sákanake jáni? ¿Juka jínëuriata  
tüisi yörisi machik kía kaítäpo  
bichäteko? Jü Señor fári bétana

bát ä nookak, kësam huëpo;  
jume ä jikkajakame éntok itom ä  
téjhuak. <sup>4</sup>Ínëli Dios ä lütüriatey  
ámemaki. Jume señaalim entok  
buéresi huëpo kaa täyahuamta  
entok obiachik kara johuamtam  
johuay. Espíritu Santo éntok ámet  
ä näikimtey, ä éä pámani.

### *Jü yore jínëihuamta yáakame*

<sup>5</sup>Bueituk Dios kaa jume  
ángelesim mámpo ä tójjak, juka  
ánia äbo huémta; fári bétanate  
náu ettejo. <sup>6</sup>Të séjtul huëpo senu  
nookak, Diosta noki jiojteripo ínel  
jíaka:

¿Jábesa jü yoreme em áu  
huáatinakë béchïbo,  
entok jü yoremeta üusi em áu  
yéebijnakë béchïbo?

<sup>7</sup>Íkäre yáaka ángelesim beu chë  
ili bétuk ä tahuariak.

Ä yörinäu éntok simek béppa  
ujyorike ä coronatuak.

Éntoke juka em yáakäu simate  
ä mámpo tójjak.

<sup>8</sup>Simate ä guókim bétuk  
tahuariak.

Bueituk ínëli sìmeta áa bétuk  
tójaka, kaita yeu bëaka, sìmeta áa  
bétuk tahuariak. Tëte ketune kee  
jee ä bitcha, juka sìmeta áa bétuk  
tahuanakemta. <sup>9</sup>Tëte huákái  
bitcha, juka ángelesim násuk ili  
bétuk tahuariahuakamta. Jesús  
ä yörihuäpo entok simek béppa  
ujyorik coronatuahuak. Jiokot  
áu ä sikäpo muukuk, bueituk  
Diosta sìmem náké béchïbo  
kókkohuamta nüka.

<sup>10</sup>Ínëli türiakay sìmeta  
áttiakamta béchïbo, bueituk  
áapörík béchïbo sime aayuk. Ä

üusim simek béppa ujjorikum am huéria báreka, jum jiokot anhuäpo yúmalasi ahuä nütuak, juka jínëuriata áme béchibo yáakamta. <sup>11</sup>Bueituk Dios santosi jíapsihumta yore makame, entok jü santosi jíapsihumta mabetame. Simetakam hupulaik jíba achayek. Huäri béchibo jü Diosta Üusi kaa ámey tihueka am saila rókka, <sup>12</sup>ínel jíaka:

Em téhuamne ín sailammeu noknake,  
entokne yún emo náu tóijlame  
násuk himnomne emo  
béchibo buiknake.

<sup>13</sup>Entok júchi ínel jiaahua:  
Ínapone át éenake.  
Júchi éntok bemelasi ínel jiaahua:  
Éni ínapo, entok jume usim  
Diosta nee mákakähui.

<sup>14</sup>Jachin jume usiarim náu áchayek takaapo entok ójbopo am nanälaitukä bénasi, áapo két takaapo entok ójbopo ánëli áu jípurek. Bueituk ímí huämi ä mukukäbey, juka kókkokhuamta núk kátekamta kaítäpo tahuariak. Íri béja jü diablo. <sup>15</sup>Huanäi kaítäpo am yáaka, áma yeu am huíkkek, jume simem kókkohumta májhueka áa bétuk emo jípureihum, bem kókkou tájti. <sup>16</sup>Bueituk tua lútüriapo kaa jume ángesim aniak, ál-la jume Abrahamtat yeu kat-riam. <sup>17</sup>Íäri béchibo úttiatakay, simeku ä sailam benatunakähui. Ínëli yore nák jiokolihumta jípureka huitti tiöpopo chë néshue, Diosta néshui joaka, entok juka pueblopo kaa türik bem yári am úuhua. <sup>18</sup>Bueituk áapo két jiokot

ansuk, kaa tühuapo jöbilahuaka. Íäri béchibo áapo úttiata jípure, jume kaa tühuapo jöbilahuame ania béchibo.

*Jesús Moiséjta béppa  
chë yörisi maachi*

**3** <sup>1</sup>Juntuksan Cristopo itom hermaanom yeu púarim, téhueka bétana núnutaka jíapsame, áachem suuhua, jü apóstol entok tiöpopo buere yäutat itom át éäpo, Cristo Jesústachi. <sup>2</sup>Áapo kaakun bíchaa áu náyoteka ä yuktiahuaka páman jíba áu nüka, entok Moisés kétchi ánëli, simekuu jum Diosta jóapo. <sup>3</sup>Bueituk íri, Moiséjta béppa buéresi yörihuaka bít-hua, jachin jü kárita yáakame chë yörihuaka bít-hua, jü kárita béppa. <sup>4</sup>Bueituk jábe ä yáala, juka kári yáataka kátekamta; të juka sime ayukamta, Dios ä yáuhua. <sup>5</sup>Lútüriapo Moisés simeku kaa áu náyoteka tekpanuak, jum Diosta jóapo, ä sáyhuaka pámani. Íri lútüriataka taahuak, áa bétana tüisi nokaka. <sup>6</sup>Të Cristo usiaritaka ájária, entok kárita béppa lútüriata jípure. Íri kári éntok ítapote ájáriam, bueituk ítapo itom mabetakäu kaa ito náyoteka ä ériakátek itom jiapsäu tájti át éaka, entok juka jita boobít-huäpo ito jábeleka.

*Diosta pueblo jimyoreria*

<sup>7</sup>Huäri béchibo, jü Espiritu Santo ínel jiaahua:  
Bueituk empo ä nokäu én  
jíkkajáteko,  
<sup>8</sup>katem enchim jíapsim  
námakasi johua,

júnak-riapo jume Diosta  
béj-reka ánia bueka päriapo  
jiöbilahuaka ayukame bénasi.

9 Ímirim nee jiöbilak, jume  
enchim áchayim.

Nechim jiöbilak nee áma  
yumäu jüneria báreka.

Huanärim juka ín yáakäu  
bitchak, cuarenta  
huásuktiriampo.

10 Íari béchibone ámeu  
öomtek, huamei nát tómti  
katemmehui, ínel jáka:  
“Jíbem náa kannake, enchim  
jiápsipo kaa yánti éaka,  
éntokem ín böom kaa täya  
báare.”

11 Huäri béchibo ín öomtëu bát  
kéchakane ínel jiaahuak:  
Kaibum áman kimunake jum  
inot jimyorehuäpo.

12 ¡Áachem suuhua!

Hermaanom, enchim násuk  
kaabe kaa türik jiápseka kaa ä  
súaleka áu náyotenake, jum Dios  
jiápsamta súalhuäpo. 13 Ál-lem  
chikti táapo kuttílasi náu nooka,  
ketune tiempota jípureka,  
bueituk ínëli kaabe enchim násuk  
námakak jiapseka annake, kaa  
türikuu baítaütaka. 14 Bueitukte  
Cristotamak ä áttiak, juka áa  
bétana itom jipunakëhui kaa ito  
nayoteka itom naatekäpo bénasi.

15 Én éntok íkai nokhua násuk:  
Eme ä nokaü én jikkajakäteko,  
katem enchim jiápsim  
námakasi johua,  
jume júnaköri nee  
öomtituakame bénasi.

16 ¿Jábesamme, jume ä  
jikkaijsuka, ä öomtituakame?

¿Jachum kaa síme jume Egiptopo  
Moiséjtamak yeu sájakame?

17 ¿Jábemmaksu cuarenta  
huásuktiapo omtey? ¿Jachu kaa  
jume Dios bejrim yáakammaki?  
Ímëi bem takahuam éntok ánia  
see päriapom huátteka kókkok.

18 Éntok, ¿jábemmeusu ä noki bát  
kéchaka am téjhuak, kaa áman  
am kimunake tíaka, jum áamak  
jimyorehuäpo? ¿Jachu kaa jume  
ä nésahui kaa yáakammehui?

19 Éntokte am bitchak, kara áman  
kimuka am tahuakahui, kaita bem  
súalëra béchibo.

**4** 1 ¡Átte suaka Diosta  
máujnake! Bueituk jachinai  
junne jü jimyorehuäpo kimu  
báahuaka boobit-huame, huate  
enchim násuk aneme kara ä  
jájameka tahuanake. 2 Bueituk itou  
két jíba ánëli nok-ri, jü bemela  
noki bempörimmeu bénasi. Të jü  
noki bem jikkajakähui, kaitapo  
taahuak, juka Dios éehuaamta  
kaa am jípureka béchibo, jume ä  
jikkajakame. 3 Të ítapo ä súaleme  
áamakte áman kimula, jum  
jimyorehuähui, ä jákã pámani:

In omtëune bát kéchaka am  
téjhuak,  
kaa áman am kimunake tíaka  
jum jimyorehuähui.

Éläposu juka tékilta béja  
chúpasulatukay jiöbe, juka ániata  
naatekäpo naateka. 4 Bueituk  
séjtul huëpo jimyore taahuata  
bétana ínel jiaahuak:

Dios jimyorek síme tékilta  
yáasuka,  
jum guoy búsan taahuata  
huëpo.

5 Éntok ímí júchi bénasi:

Katim áman kimunake, jum ín jimyorehuähui.

<sup>6</sup>Huári béchibo, ketune huate bëye áman bem kimunakëhui, entok këtchi huame bát bemela noki ámeu nokhuakammehui, katim áman kiímuk, nésauta kaa bem yáakä béchibo. <sup>7</sup>Én éntok júchi taahuata yétchak éni, ínel jíaka: Chúkula tiempota simsuko, Davidta huam, ínel jíayhuäpo:

Eme ä nokäu én jíkkajakátek, katem enchim jíapsim námakasi johua.

<sup>8</sup>Bueítuk Josué juka jimyore taahuata am mákakáteko, kaibu júchi täbui taahuarita bétana nok éiyey. <sup>9</sup>Huári béchibo ketune jimyore taahuari áma tahuala, jú Diosta pueblo béchibo. <sup>10</sup>Bueítuk jú Diostamak jimyorehuäpo kibak-lame, két tékilta yáasulataka jimyore. Dios két alë bénasi jimyore, ä tékil yáasulataka. <sup>11</sup>Ámante kimu báreka éenake, jum jimyorehuäpo; bueítuk kaabe áma áu náyotenake, huámëi bénasi, jum nésauta kaa johuäpo, kaa türiku.

<sup>12</sup>Bueítuk jú Diosta noki jíapsa, entok símeku áma yuuma, entok síme kúchirim náu bíchaa buahuiakame bénasi chë mékka tájti ára jita chúkta. Jíapsichi entok espíritut junne ára kibake, óta tónoapo entok tuétanompo junne; entok juka yorem éeri jíapsipo ayukamta júneria. <sup>13</sup>Jü yáataka ayukame ä bíchäpo kara éсотu, entok síme súpe joaritaka étapori ä bíchäpo. Huáahui lúl-late jápteка yeu ä buíjnake, itom yáalähui.

### *Jesús jú buere sumo sacerdote*

<sup>14</sup>Én éntokte ä jípure, juka sumo sacerdoteta, téhuekata béppa jikau sikamta, Jesús jú Diosta Üusi. Áapörík súalhuápote jíba annake. <sup>15</sup>Bueítuk iri sumo sacerdote ára itom jioleka ára itom ania. Júneyia ítapola kara itom áma yumähui. Áaposu két ito bénasi kara áma yúmam ténaka jiöbilahuak, të áapörikut jú Dios bejri kaita át aykay. <sup>16</sup>Áute rúktinake, tüisi át jíapseka, Diosta yörisi kátekäpo, juka nák jiokolihuamta jajam báreka, entok Diosta túhuapo kaita bëaka jiokot anhuäpo yore aniamtahui.

**5** <sup>1</sup>Bueítuk síme sumo sacerdote yoremem násuk yeu púari, áme béchibo obisi an íaahuaka Diosta bétana núnuri, juka Diostau bíchaa näikiata entok animaalim ójbo, jume Dios bejrim béchibo ä yáa íahuaka. <sup>2</sup>Bueítuk yánti áu nüyeka ára am



(Hebreos 5:4)

boobinnake, jume kaita täyaka kaa tühuapo emo näyotelame entok kaa suasi emo nüyeme, jünéaka áapo két áme Bénasi kaa úttiaka jíapsihuäpo áu innéaka.

<sup>3</sup>Júneli juka Dios bejri áapörikut éntok yoremraatat ä ayuka béchibo, úttia ili kabarata mäaka Diostau bíchaa ä näikianakëhui, yoremraata béchibo entok áapo béchibo.

<sup>4</sup>Bueituk kaabe kia ínel ä éä béchibo tékilpo áu úttilebo báanake, ál-la hua núnuritaka Diosta bétana yuktiari, Arónta núnuhuaka Bénasi. <sup>5</sup>Júnëli kétchi Cristo jum símek béppa ujyoriku kaa áu úttilek, juka sumo sacerdote tékilta áu mákaka, ál-la hua ínel áu jíakame:

Émpë ín Üusi;  
ínapone i taahuarit enchi  
usiak.

<sup>6</sup>Bueituk kétchi sékána ínel jiaahua:

Émpë tékil sacerdoteta yúu  
tútti jonake,  
Melquisedecta yoremempo  
jometaka yö yáatuká  
pámani.

<sup>7</sup>Të Cristo ímí buíapo jíápsaka, jikot éaka nookak, ópuam guötiaka hua úttiata jípuremtahui, ä muknakepo ára ä jínëumtahui. Ínëli éntok íäri béchibo jíkkaijtuk, yörisi májhueka. <sup>8</sup>Usiaritaka junne, jikot ä anë násuk, nésauta ára joaka taahuak. <sup>9</sup>Entok yúmalasi chúpemta mákhuaka, juka jíbapo béchibo jínëuriata yáuhuak, símem ä nésahui jo báareme béchibo. <sup>10</sup>Huanäi Dios ä jünëriatebok, sumo sacerdote

tékilta ä mákaka, Melquisedecta gentepo jometaka yö yáatuká pámani.

*Jínhua maachi, jü Diosta  
súaleka ä tóijhuame*

<sup>11</sup>Íäri bétanate yún ára jita nooka, të obiachi jünakiachisi ä nok báahuäpo, enchim kaa huitti jíkkajä béchibo. <sup>12</sup>Bueituk eme béjem huatem ára majtia éiyey, bueitukem béja yún tiempota huéria. Të ketune bëye jü enchim majtianähui, juka chë kaa obiachik Diosta nokpo bát huémta. Éntokem ínëli kaa áma yúmaka tahuala, ili usita lechim jëyë Bénasi; bueituk karem buáhuamta buäye. <sup>13</sup>Síme jume ketune lechi jëyeme ketim jee árahue, jum lútula huémntat jüneeahuäpo; bueituk ketunem ili uusim. <sup>14</sup>Të jü bette buáhuame jume yötulame béchibo. Ímëri jum élaka jita johuäpo emo majtialataka, akim ä jünëria, juka jüneeahuamta, tühuata entok kaa tühuata bétana.

**6** <sup>1</sup>Huäri béchibo, juka bát itom majtiahuaakau huamte sákasuka, Cristota bétana huémnta yúmalasite bát bíchaa át jíapsi báreka éenake. Katte júchi ito ä majtianake, juka téta nahuata júchi yecham ténasi entok juka tekil mukiaapo hueme kókkko huaú yore hueriame. Të jü Diostat éehuame íri jü jíapsi kúaktihuame, <sup>2</sup>jü batóhuamta bétana yore majtiahuame, jü jábetat béppa mámteka Diostau ä nok-riahuame, jü kókkolam jíabitëhui, entok jü bette noki

jíbapo béchïbo chúpanakeme. Bėjate simeta íkái täyasula. <sup>3</sup>Entokte íkái yáanake, lútüriapo Diosta júnel éayo.

<sup>4</sup>Bueituk karam jájamtuka tatahua, jume séjtul machiriata mabetakame, jü jikattana Diosta tü éeri bem jihuekäu entok Espiritu Santota huam bem mabetakähui, <sup>5</sup>Diosta tü noki entok juka úttiäraata ánia äbo huémntat jihuekame. <sup>6</sup>Ímëi amáu nóttekame karam júchi bemelasi jíapsi kúakte, juka Diosta Üusi bempörim béchïbo júchi bemelasi kúrusit poponteboka, júchi simem ä junnerianakë béchïbo. <sup>7</sup>Jü buía juka yúkuta juebénasi kóm huáttemta jëyeme, entok júya sfarita yoyötutuame, türi takaka jume buíata tekipanuame béchïbo, iri buíya Diosta tühuam mabeta. <sup>8</sup>Të jü buía huíchata entok táchïnota sisiuriame kaa türina; chúkula bette noki át chúpahuaka táana.

*Jü bobithuame huitti ehuäpo itom jipurëhui*

<sup>9</sup>Én éntok, eme nákuhame, huittite jüneya juka jita chë türiaka bétana, jínëuriata jípureka, éläposute ínëli nooka. <sup>10</sup>Bueituk Dios tü éehuäpo lütüria páman jíba aane; áapo kaibu ä koptianake, juka tékilta áapörík nákeka enchim yáakähui, jume Diosta bíchäpo santosi emo nüyeme béchïbo; éntokem ínëli ketune jita am joria. <sup>11</sup>Tëte enchim hueuhuëpulammet ä bít péiya, juka jíba enchim joähui kaita yeu bëaka enchim

jiápsau tájti, juka huitti éaka boobit-huamta. <sup>12</sup>Bueituk jü óbera kaa enchimmet ayunake, ál-lem huame Diostat éaka tekipanuame entok ínëli jume yánti éaka juka Diosta nokakäu mabet báareme. Ímëi bénasem emo nü báreka éiya.

<sup>13</sup>Bueituk júnakoy Dios juka Abrahamta mabetnakëu ä mák rókaka nookak. Të kaabeta áa béppa chë yörisi machik téhuak, nokta yéchä béchïbo. Huanäi áapo áu bát kéchaka nokta yétchak, <sup>14</sup>ínel jíaka: “Ínapone tua lútüriapo juebena tühuata enchi máknake, entokne jume emót yeu katnakeme buéresi am bürurianake.” <sup>15</sup>Ínëli yánti éaka ä boobícháihuik. Huanäi ä jájamek, juka nokta yéchapo áu nokhuakamta. <sup>16</sup>Bueituk jume yoremem tua lütula huëpo jábeta chë yörisi machik bát kéchakam nokta yéecha. Huanäi jü noki bát kéchahuakame lütüriataka chúchupe. <sup>17</sup>Íäri béchïbo, juebénasi Dios kálakosi ä bittebo báreka, jume ä mabetnakeme béchïbo juka yörisi machik bát kéchaka nokta máktaka bem boobícháihui, ínëli yúu tútti ä lütüriatebok, juka yörisi machik bát kéchaka ä nokakähui. <sup>18</sup>Bueituk ímëi guoy huëpo kara täbuiasi yáatüpo, Dios kara ára nókichi. Ímëte úttesi jíapsi jóotehuamta jípure, áu rúkteka áapörícut boobícháihuime. <sup>19</sup>Íkäite nülatoka itomak ä jípure itom jíapsi béchïbo, barco ancla tenasi. Íri éntok áman téhueka tiöpopo velota bia tájti yúmala.



**20** Ímìri Jesús bát áman kibakek ito béchìbo, jìba béchìbo sumo sacerdote yáataka, Melquisedecta gentepo jometaka yò yáatukä pámani.

### *Melquisedecta sacerdocio*

**7** <sup>1</sup>Íri Melquisedec Salempo rey, yörisi jikat Diostau sacerdotetukay. Abrahamta nankirika yeu siika, nássuahuäpo reyesim kobalataka ä yebisiseyo. Huanäi juka Diosta tü eäu ä mákkak. <sup>2</sup>Huanäi Abraham nássuaka jum simeta ä kobakäu áapörìk diezmota mákkak. Jume Melquisedecta téhuam éntok ínèlim jiau báare “tua bát lútula huëpo rey”; entok Salempo rey, ìri éntok yánti jíapsihuäpo “rey ti jiau báare”. <sup>3</sup>Kaa áchayek, kaa áiyek, entok áapat kat-riam júne kaa jípure; jita táapo ä naatekäpo júne kaa taahuarim jípure, entok jákun tájti ä jíápsakäu junne. Të ä jíápsäpo Diosta Üusi bënna, entok yúu tütti sacerdocio tékilta jípure.

<sup>4</sup>Tüisem át suaka ä bitcha, juka buéresi yörisi maachi. Íkari jü Abraham áchayripo huéeri, jum nássuahuäpo ä kobakäu diezmota ä mákkak. <sup>5</sup>Tua lútüriapo jume Levíita usiarim tékil sacerdociota mabetak, entokim nésauta jípure, pueblopo diezmom bem nünakë béchìbo, leyta jíä bënasi. Ímëi bem saylahuam, éláposum bempo két Abrahamtat yeu sákala. <sup>6</sup>Të Melquisedec jume áapat kat-riammak kaa huéritaka junne, entok kaa Levitammak näikiatukay. Të júnentaka junne, Abrahamta bétana jume

diezmom mabetak. Huanäi huaka Diosta bétana mabet báahuamta jípuremta, Melquisedec Diosta tü eäu ä mákkak. <sup>7</sup>Kaa yún nokhuäpo síme jüneiya: jü chë ilitchi jü chë yöta bétana Diosta tü eäu mabeta. <sup>8</sup>Të tua lútüriapo ímï buíapo jume yoremem kokókkome diezmom mamabeta; të huämi éntok senuk bétana nooka, ketune ä jíapsähui. <sup>9</sup>Entok ínëli jíayhuäpo, Levíi Abrahamtamak diezmom béjtuak, entok áapo két diezmom mabeta. <sup>10</sup>Bueítuk Levíi ketune kee jee yorei Abrahamta, juka Melquisedecta ä nankiseka yeu ä siiko.

<sup>11</sup>Bueítuk juka levíita sacerdocio tékil yúmalasi áhuä jípureyo, ¿jatchiakasu jita áma bëye bënasi täbui sacerdote áu tóboktia, bueítuk ikäi bétuk jü yoremraa leyta mabetak, Melquisedecta gentepo jometaka yò yáatukä pámani? Entok, ¿jatchiaka kaa núnuhuak, Arónta gentepo jometaka yò yáatukä pámani? <sup>12</sup>Bueítuk jü tékil sacerdocio kúaktiahuakatek, két úttia juka leyta kúaktianähui ä yáa béchìbo. <sup>13</sup>Jü íari bétana nokhuakame täbui tribupo joome; të ímëi náu huéerim juka tíöpopo altar tékilta, kaabe ä yáuhuak. <sup>14</sup>Bueítuk jünakiachisi täyahua, jü itom Señor Judáta familiapo huéritaka. Íari bétana éntok Moisés kaita nookak, tékil sacerdociota ä jojoaí bétana.

<sup>15</sup>Íri éntok chë júne jünakiachisi täyahuak, të jábe Melquisedecta bénaaka áu tóboktiakátek, juka tékil sacerdociota täbuiasi joaka.



**16**Kaa yorem ley chúpata hué páman yáataka bem familiapo huéritaka áma yeu sákalame, ál-la kaa ä muknakepo úttiata jípurëhui. **17**Bueituk áa bétana nokhuaka täyahua:

Émpë jíbapo béchibo  
sacerdote,  
Melquisedecta yoremraapo  
jometaka yö yáatukä  
pámani.

**18**Íari béchibo jü nésauri bannaataka huéri kaitäpo taahuak, kaa úttiata entok kara jita ä joai béchibo. **19**Íneli jü ley kaita yúmalasi yáhuak. Íneli naate jü chë türi boobit-huame; fári béchibote Diostau rukte.

**20**Íri kaa kía yáahuak, ál-la jü noki yörisi machika bát kéchahuaka yáahuak. **21**Bueituk jume huate sacerdotem kaita noki yörisi machik bát kéchahuakam áma yeu púahuak. Të یری, juka yörisi machik bát kéchakame ínel áu jiaahuak:

Jü Señor yörisi machik bát  
kéchaka,  
kaibu amáu bíchaa kúaktinake:  
“Émpë sacerdote jíbapo  
béchibo,  
Melquisedecta yoremraapo  
jometaka yö yáatukä  
pámani.”

**22**Íari béchibo Jesús juka nokta náu tütehuäpo chë türík, ä lütüriatunakë béchibo, áu bát ketchak. **23**Jume huate sacerdotem éntok emom büruriak, bueituk bem kókkö béchibom kara naa búrujti át kaatey. **24**Të یری, jíbapo béchibo jíapsaka, sacerdocio tékilta jípure, kaa

lülütemta. **25**Huári béchibo kët jíbapo béchibo ára am jínëu, jume áapörík éä páman Diostau rúkteme, huanäi jíapsaka kaa chúkteka áme béchibo Diostau am nok-ria.

**26**Bueituk یری sumo sacerdote ito béchibo türiakay: huépülsi áu nüyeka, kaa juënak éaka, jita chicha machi kaa át cháchätu. Juka kaa türík johuä násuk sékana áu jípure, entok téhuekata béppa chë mejikat tóboktiari.

**27**Juka jiokot éhuamta kaa chíkti táapo jipurey, jume huate sumo sacerdotem bénasi. Ímëri bát juka Diostau bíchaa näikiatam jojoa, bem kaa tü yáarim béchibo, chúkula éntok jume pueblota yáarim béchibo. Íkari Jesús séjtul jíba ä yáhuak jíbapo béchibo, Diostau bíchaa näikiapo áu tójaka.

**28**Bueituk jü ley nokta chúchupa, sumo sacerdotem áma joaka, yoremem kaa úttiakame; të jü noki yörisi machika bát kéchari, leytapat chúkula huéeka, jü usiari kaita áu bëyeka yúmalasi yári jíbapo béchibo.

*Jesús násuk huéeka  
bemela nokta tüteme*

**8** **1**Én éntok türi jióbe, jü tua bát huéeme itom náu ettejhuasakäpo, jü sumo sacerdote itom jípureu, téhuekapo buéresi reytaka jojuhuäpo bátatana yejtek. **2**Diosta káripo tékilta johua. Huári kári tua lütüriapo tabernáculo. Íkari jü Señor ä tóboktiak, kaa jü yoreme. **3**Bueituk síme sumo sacerdote juka leyta jíá páman áma yéchari, juka Diostau bíchaa

näikiata entok jume kaa tü yáarim béchibo kabaram súahuamta ä yáanakë béchibo. Íari béchibo úttia áapörík két jita huériaka Diostau bíchaa ä kíktenakëhui.

<sup>4</sup>Ä ínëlituk ímí buíapo anëtek, katchan júne sacerdotetu éiyey, jume sacerdotem ketune ímí anë béchibo. Ímëi juka Diostau bíchaa näikiatam jojoa, leyta jfä pámani.

<sup>5</sup>Të ímëi ä johua, juka téhuekapo johuamta bénnak. Íri éntok mamatuahuaka jékkaataka bíttu, juka Moiséjta ä téjhuaahuaka pámani. Tabernáculota ä yáa sáuhuek, ínel áu jíaka: “Tüise át suaka ä bitcha; huanäre ánëli ä yáanake, tua alë bénnak, júya káupo em ä bíttuahuaka bénasi.”

<sup>6</sup>Të ëni chë tüiri tékiata máktaka ä johua, bueítuk Áapo yoremta entok Diosta násuk huéiyek, juka chë yörisi machik nokta náu tütehuamta yáa báreka. Íri éntok yáataka óorek, juka chë türík nokhuaka boobít-hua pámani.

<sup>7</sup>Të huári bát huéeme türika yeu sikátek, tua lütüriapo kaibu jariu éehuay, jum guosa huëpo ä yáanähui. <sup>8</sup>Bueítuk kutti ámeu nonokak, ínel jíaka:

Én éntok béja taahuarim äbo huéiye, jü Señorta jíä bénasi. Nokakane nokta bemelak náu tütehuamta yéchanake, Israel entok Judáta gentemmaki.

<sup>9</sup>Kaa juka nokta náu tütehuamta bem áchayimmak ín yáakä bénasi, ál-la jü júnak taahuarimmet mámpo am buíseka Egipto buiärapo nee yeu am huíkekäpo bénasi,

bueítuk bempom juka ín noki náu tütehuakapo, ámanim kaa aayuk,

jü Señor ínel jiaahua:

Ínapone bempörim kía tójjak.

<sup>10</sup>Huári béchibone juka nokta náu tütehuakamta yáanake, jume Israelta gentemmaki. Entok két ínel jiaahua jü Señor: Chúkula huámechí taahuarimmet, jume ín leyimne bem kóba súahuapo órenake, entokne bem jíapsimpo am jjojtenake.

Entokne áme béchibo

Diostunake;

bempo éntok ín pueblotunake.

<sup>11</sup>Entok kaabe tábuik

majtianake,

áamak aani junne, ínel áu jíaka: Señortë täya.

Bueítuk simetakam nee

táyanake,

bempörim násuk jü chë ilitchi éntok jü chë yötau tájti.

<sup>12</sup>Jum bem kaa tü yáarimpone

am jioekorinake;

entok jume bem kaa tü

ayulammehui,

kane éntok ámeu huáatinake.

<sup>13</sup>Bemela noki náu tüterita

jiäpo, juka bát huémta öra tía

báare. Huanäi ínëli jü öratata

tahuame momoye, entok sep jëla kaitatunake.

*Jü buíapo entok  
tehuekapo santuario*

**9** <sup>1</sup>Én éntok, jü bát huéeka noki náu tütehuame, Diosta yöri béchibo nésauta jípurey, entok jü kári ímí buíapo Diosta

áma yörihuäu yáatukay. <sup>2</sup>Jü tabernáculu éntok ínëli órekay: násuk áman náikimtetaka, jum bát huëpo, véelota bía huam bíchaa santosi täyahuay. Ímirim órekay, jü candelabro, jü mesa entok jume páanim Diostau bíchaa náikiari. <sup>3</sup>Të guosa huëpo velota bía huam bíchaa jü tabernáculota senu huéri áma órekay. Íri símek béppa santosi täyahuay. <sup>4</sup>Ímí órekay jü incensario oro áusülitaka, entok két áma órekay jü nokta náu tütehuäpo arca, símekut oro át téktaka. Ímí huáijhua éntok jü urna ti täyahuame oro áusülitaka. Ímí huáijhua éntok maná áma órekay, éntok jü Arónta kuta basihuekame, entok jume guoj mamni nésahuim tétapo jiojteri. <sup>5</sup>Íari béppa éntok jume querubnim símek béppa ujjorika jábuekay, bem másammey juka jü nokta náu tütehuäpo arcata páttialataka. Ímíri ojbo öorehuay jume Dios bejrim tucha béchibo. Íari bétanate én kara yún jita nooka.


<sup>6</sup>Ínëli béja huéchiasi áma óresuka, jum tabernáculu huépul kätana ä náikimteripo, jume sacerdotem élaka áma kíkkimu, juka altarpó tékilta yáa báreka. <sup>7</sup>Të jum senu kätana ä náikimteripo, jü sumo sacerdote áapo jíbba huásuktiapo séjtul ójbota huériaka áman kíkkibake, bueítuk ójbota kaa huériaka kara áman kibake. Íkái yörisi machik Diostau bíchaa náikiata huéria, áa béchibo, entok jume kaa jünéaka pueblopo Dios bejrim

yáalame béchibo. <sup>8</sup>Jü Espiritu Santo am jüneetua, juka símek béppa santosi täyahuamta, juka böota áman bíchaa bókamta kee étapohuaihui, jum tabernáculu huépul kätana ä náikimteripo, juka oficio tékilta ketune áma johuayo. <sup>9</sup>Íri ímëchi taahuarim béchibo ejemplo, juka ímí nokta huë pámani jü Diostau bíchaa náikiari entok jü kabaram súahuame. Júnentaka junne íri kara jíapsi éerita yúmalasi johua, jü Diosta ínëli yörihuame. <sup>10</sup>Íri béja jübuahuame entok jita jihuame jíbba, jü jaikisi emo báksiaka Diosta yörihuame, nésauri yáataka takaahuata béchibo órekame. Íri ínëlitunake, juka tiempota yúmako símeta bemelasi yáahuäu tájti.

<sup>11</sup>Të Cristo yepsaka béja ímí aane. Íri áu sumo sacerdote jü tühua äbo huémtahui. Jü tabernáculu ä tékiakäpo chë türika yúmala, entok kaa mámammey yáari, ál-la ínel jíayhuäpo kaa ímí buíapo joome.

<sup>12</sup>Entok kaa jume chiböram entok beserom ójbo huériaka, ál-la tua ä ójbohua huériaka, séjtul jíbapo béchibo áman kibakek, jum símek béppa santosi täyahuahui. Huanäi ínëli ä yásuka ä mabetak, juka jíbapo béchibo jñëuriata. <sup>13</sup>Bueítuk jume torom entok jume chiböram ójbo, entok jü beseerota náposa jume chicha machimmet áa béppa huáttiahuakatek, báksiahuaka juka chicha machik takaahuat úhuataka tatahua.

<sup>14</sup>ÍTë chë júne úttiak, jü Cristota



(Hebreos 9:14)

ójbo! Áapo kaa chicha machik jípureka Diosta bíchäpo áu tójjak, jü jíbapo béchïbo Dios Espírituta huämi. Huanäi áapo ä ójboy kókkohuäpo jita johuäpo itom ä úhuanake. Huanäi ínëlite Dios jiápsamta nésahui jonake.

<sup>15</sup>Íari béchïbo, Áapo násuk huéeka taahuak, juka bemela nokta náu tütehuäpo. Ínëli ä muknakeu úttiatukay, jume nokta bát náu tütehuaka bétuk jume Dios bejrim jìokorinä béchïbo, ley nésauta kaa johuäpo. Huanäi jume núnurim juka boobit-huamta mabetnake, juka herenciata jíbapo béchïbo näikiata áme béchïbo.

<sup>16</sup>Bueituk jábetau senu jita tö sim bárëteko, jiösiata yáatebonake. Huanäi úttia, juka jiösiata yáatebokamta muknakëhui.

<sup>17</sup>Bueituk juka jiösiata yáakamta

mukuk, lútüriataka tatahua; të kee jee ä mukeyo kaita bėj-re, jü jiösia yáahuakame. <sup>18</sup>Íari bétana kétchi, jü noki bát náu tütehuakame junne ójbo guötipo chúppuk. <sup>19</sup>Bueituk Moisés sime ley nésauta gentetau noksuka, beseero entok chiböra ójbota nuka bäammaki. Entok kabara bóa síkirik, júya hisoopota huanäi am kómoniak. Huanäi libro nésautat ä sítiak, entok sime gentetachi, <sup>20</sup>Ínel jíakari: “Íri jü nokta náu tütehuakapo ójbo, Diosta enchimmet nésahueka pámani.” <sup>21</sup>Entok kétchi, ójbota át sítiak, jü tabernáculotachi, entok jume Diosta yörihuäpo jita ámey johohuammechi. <sup>22</sup>Entok ójboyi batte sime báksiataka tahuanake, leyta jiä pámani; të ójbota kaa guötek, Dios bejrim kara jìokorina.

*Cristota kúrusit mukukäu  
Dios bejrim yore úhua*

<sup>23</sup>Úttiataka tatahuay, juka téhuekapo ayukamta bennak ínëli ä bákxiatunähui; të jü téhueka bétana huéeme huatek béppa chë türik Diostau bíchaa näikiata huáatia. <sup>24</sup>Bueítuk jü tua símek béppa santosi täyahuame Cristota kibakekäpo jü bát yáahuakamta bënna, të kaa mámmey yáari, ál-la téhuekapo Diosta anëpo óorek. Huanäi Áapo áman kibakek, ito béchïbo. <sup>25</sup>Entok kaa juebénasi áu tójaka áman kibakek, jáchin juka sumo sacerdoteta áman kíkkibake bénasi, jum símek béppa santosi täyahuähui, chíkti huásuktiapo, të täbuik ójbo huériaka. <sup>26</sup>Të täbuiasi ä huéenakeyo, úttiatu éiyey juebénasi jiokot ahuä bínnakëhui, juka ániata kësampo naateka. Të ëni jume cien huásuktiriam nat sáu kateme lütëpo, jíbapo béchïbo séjtlul jíba ä yáhuak, juka jiokot áu sikamta, juka kaa türik áme násuk ayukamta kaitapo tahuaria báreka. <sup>27</sup>Bueítuk ínëli chúpari jume yoremem, séjtlul jíba am kókkonakëhui; chúkula entok jü bette noki ámet chúpanake. <sup>28</sup>Ínëli këtchi jü Cristo séjtlul jíba jiokot ansuk, jume juebena Dios bejri yáarim jípurëu huéria báreka, entok guosa huëpo, yepsaka Dios bejrim johuäpo kaita áma jípunake, jume ä boobíchaihuime jínëu báreka.

**10** <sup>1</sup>Bueítuk jü ley juka tühua äbo huémnta jékka jípurey, të kaa tua ájáriatukay

jü yebijnakeihui. Jume chíkti huásuktiapo animaalim sússuahuaka Diostau bíchaa am näikiahuame, ìri kaibu yúmalasi emo am jíputuanake, jume áman rúkte. <sup>2</sup>Ä junëlituk kaa éntok yáa éehuay, bueítuk jume íkai Diosta yörihuäu joame senu huëpom kaa chícha machika tahua éiyey, entokim bem jíápsipo kaa ä jípureka tahua éiyey, juka Dios bejrita. <sup>3</sup>Të ìri chíkti huásuktiapo animaalim sússuahuame, ámeu huauhuaatihua, jume Dios bejrihuammehui. <sup>4</sup>Bueítuk jume torom entok jume chivam ójbo karam jábeta ä úhua, jume Dios bejrim.

<sup>5</sup>Huäri béchïbo ániau kibakeka, ínel jiaahuak:

Juka animaalim súaahuaka emou bíchaa näikiahuamté kaa huáatiak, ál-lë takaahuata nee mákkak.

<sup>6</sup>Jü ójbo altarpo sítiahuame entok jü huakas tájipo táahuame Dios bejrim béchïbo, katim enchi al-leetuak.

<sup>7</sup>Huanäine ínel jiaahuak: “Dios, ímine emou huéiye, em nésahui yáa báreka, jáchin jum libro royopo ino bétana ä jiojteri pámani.”

<sup>8</sup>Ínel bát jíaka: “Jü animaalim súaahuame, jü Diostau bíchaa näikiahuame, jü altarpo ójbo sítiahuame entok jü huakas tájipo táahuame Dios bejrim béchïbo, katë am huáatiak entok katim enchi al-leetuak; ìri síme leyta jíá páman jojhua jíöbe.” <sup>9</sup>Entok sep ínel

jiaahua: “Ímine emou huéiye, Dios, em nésahui yáa báreka. Juka bát huémta mékke ä óóre, juka chúkula huémta áma tahuanaké béchibo.”

<sup>10</sup>Jum ínëli éehuäpote Diostamak huitti jíapsihuäpo yáari, juka Jesucristota takaahua Diostau bíchaa ä näikiahuaka pámani, séjtuli entok jíbapo béchibo yáahuakamta.

<sup>11</sup>Entok tua lútüriapo sime sacerdote chíkti táapo ä jojóa, juka oficio tékilta, jume animaalim juebénasi sússuahuamta; të ímëri jume Dios bejrim kaabeta úuhua.

<sup>12</sup>Të Cristo, áu tójaka séjtul jíba ä yáuhuak, jíbapo béchibo, juka jìokot áu sikamta, jume Dios bejrim yáarim béchibo. Huanäi Diosta bátam bétana yejtek. <sup>13</sup>Huämi bát bíchaa ä boobíchaihui, jume ä béj-reka kateme ä guókim bétuk am tóijnäu tájti. <sup>14</sup>Bueituk juka Diostau bíchaa näikiata séjtul jíba yáaka, jíbapo béchibo yúmalasi am tahuariak, jume Diostau bíchaa huitti näikiarim. <sup>15</sup>Jü Espiritu Santo két itou ä lútüriate, chúkula ínel jiausuka:

<sup>16</sup>Jü Señor ínel jiaahuak:  
Íri ájaria jü noki ámemak ín tütenakëhui,  
chúkula huamei  
taahuarimmechi.  
Jume ín leyimne bem jíapsipo órenake,  
entokne bem kóba súahuapo am jìojtenake.

<sup>17</sup>Noksuka júchi huatek nooka, ínel jíaka:  
Kaibu éntokne ámeu huáatinake, jume bem Dios bejrimmehui entok jü Diosta nésahui kaa bem yáakähui.

<sup>18</sup>Bueituk jume Dios bejri yáarim jìokorisuhuakapo, kaitatunake, jü Diostau bíchaa näikiari jume Dios bejri yáarim béchibo.

### *Diostaute ruktipo yúmala*

<sup>19</sup>Én éntok hermaanom, kaitatte obisi éaka arate áman kiimu, jum símek béppa santosi täyahuähui, Jesucristota ójbo béchibo. <sup>20</sup>Bemela böo jíápsamta Áapo itom étaporiak, cortinata órekaí pámani. Íri éntok ä takaahua. <sup>21</sup>Diosta káripo tékiakamtate jípure, juka buére tékil sacerdoociota joamta. <sup>22</sup>Íahuite rúktinake, kaita jíápsipo ésolataka, huitti itom ä súalëpo tuísi jünéaka. Kaa türík bétanate itom jíapsi báksianake; jume takahuam éntok bäam kaa chícha machimmeyi. <sup>23</sup>Lútülate kutti ito jípunake, Dios éhuamta johuäpo, kaa kom éaka itom ä boobíchápo, bueituk jü itom ä mák-rókame, ä nokäu chúpanake. <sup>24</sup>Jábeta kaa yumäpote ä ania báreka éenake, entok tühuata joaka yore nákuhäpo, náu al-lee béchibo. <sup>25</sup>Jíbate ito náu totoijnake; katte jume kaa náu yayajaka joyhualame bënasi am báanake; entokte kuttílasi náu noknake, huaka taahuata äbo huémta jüneriaka.

### *Téjhuaataka junne Dios bejrim yáuhuak*

<sup>26</sup>Ítapo itom éäpo Dios bejrik yáakátek, jü lútüriat jüneeahuamta mabetchulataka, Cristota áu tójakäu béja kaitatunake, jume Dios bejrim



itom yáakä béchïbo. <sup>27</sup>Ál-la jü bette noki Diosta chúpäu máusi machika, táji pójteka am buänake, jume Diosta béj-reme. <sup>28</sup>Jü Moiséjta ley béppa sikame guoyim ö bájim bíchäpo, kaita éntok át nátemaijhuaka mäna. <sup>29</sup>Enchim éäpo, ¿jaikisisu nat béppa ára ä mabeta jäni, juka bette nok chúpemta, jü Diosta Üusitat chepteme, entok juka nokta náu tütehuakapo ójbo guötekame, chïcha machiku ä näikiamtachi? Ímëri santosi yáahuaka junne. ¿Ä béj-rekam, Diosta tühua Espiritu kaitäpo bitcha! <sup>30</sup>Bueitukte ä täya, juka ínel jíakamta: “Ínapone ä áttiak, juka nássuahuaka yoret nóttirihuamta, entok ínapone ä béjtuanake”, ti jiaahua jü Señor. Entok júchi: “Jü Señor ä pueblobeu bette nokta chúpánake.” <sup>31</sup>¿Tepa jaanti maachi, jü Dios jíápsamta mámpo huáttihuame!

<sup>32</sup>Të huámëi taahuarimmehuem huáate, júnakoy juka Dios machiriata mabetchuka. Entok jiokot aneka júnem áma yuumak, Diosta úttiärayi jum naamuksi anhuäpo. <sup>33</sup>Të huate enchimmehui, tua lütüriapo guojajjahuakem jiokot enchimneu siika, simem bíchäpo, éntokem júchi täbuiasi am jáläeka taahuak, huame enchim bénasi ámeu huémta jípureme. <sup>34</sup>Bueituk jume pereesom júnem két jiokoleka tüisi am bitchak, éntokem juka jita enchim úuhuahuäpo júnem al-leaka át yeu sájjak, jünéaka chë türi herenciata enchim jípurëhui, téhuekapo kaa lülütëmta. <sup>35</sup>Bueituk katem

ä taru báare, juka enchim át éähui; bueituk ímï yökäteko jita buéresi mabethuamtem jípunake. <sup>36</sup>Türi, jü yánti jíápseka Diostat boobit-huame, bueituk ínëli juka Diosta nésahui yáalataka, juka Áapörík yore mák bárëhuem mabetnake. <sup>37</sup>Bueituk jü jïojteri ínel jiaahua:

Júchi chúbala jíbba,  
jü yebijnakeme yebijnake,  
entok kaa bínhuatunake.

<sup>38</sup>Të jü lútula Diostamak huéeme Diostat éaka jíapsinake;  
të jü amáu nóttekame kaibu ín jíapsi al-leetuanake.

<sup>39</sup>Të ítapote kaa amáu notte, jum emo taruhuäpo, ál-late át éehuamta jípure, itom jíapsi jíapsinakë béchïbo.

### *Diostat éehuame*

**11** <sup>1</sup>Jü huitti jita boobit-huame, Dios éehuä páman huéiye, entok kaa ä bíchaka kutti jíapsihuame. <sup>2</sup>Bueituk jume itom bát kat-riam fári béchïbom juka tühuata áme bétana nokhuamta jájamek. <sup>3</sup>Diostat éehuápámante át jüneiya ániata yáahuakahui, Diosta nokibeyi, bueituk ínëli jü itom bíchäu, kaa bít-huamtay yáahuak.

<sup>4</sup>Diostat éehuäpo Abel animaalim súaka Diostau bíchaa näikiahuamta chë türik Diostau tójjak, Caínta béppa. Íari béchïbo Diosta tüisi áa bétana nokäu jájamek, lútula jíápseka jume Diostau bíchaa näikiarim ä yáakä béchïbo. Éntok ínëli ä muksulatuk junne, Abelta yáakäu jíba áa bétana nooka.



<sup>5</sup>Enoc Diostat ä éä béchïbo núk sákahuak, kókkohuamta kaa bíchaka. Entok kaabe ä téuhuak, bueïtuk Dios ä nuk siika. Të kee jee núk sákahuaka, Diosta bíchäpo tüisi jiápsaka täyahuak.

<sup>6</sup>Dios éehuamta kaa jípureme Diosta kaibu al-leetuanake, bueïtuk Diostau rúktihuäpo úttia, jü jünee huame Áapörík anëhui, entok huame ä jariame bem kobakäu am mámaka.

<sup>7</sup>Noéta Diostat éä béchïbo, Áapo ä téjhuak, juka huéenakemta ketune kee jee bíttuyo. Diosta mauj yöreka ä jotáytek, juka arcata, ä familiahua áma emo jínëunakë béchïbo. Íkai Dios éehuamta jípureka ániat jiápsame bette nokta ámet chúpatebok, entok lútula jíapsihuamta herenciapo mabetak. Ìri éntok Dios éehuamta bétana huéiye.

<sup>8</sup>Diostat éehuäpo Abraham núnuhuak. Huanäi yeu siika, jum ä yebijnakeu herenciapo mabet báreka. Të yeu sika kaa jüneyiy jákun áu yebijnakëhui. <sup>9</sup>Diostat éehuä béchïbo áma jóakay, kaa áma jomemta bënasi jum buíata ä máknaïpo, kaa ä áttiakamta bënasi, Isaactamak entok Jacobtamak lona kárimpo. Ímëi éntok juka ä máknäu herenciapo áamak áttiakay. <sup>10</sup>Bueïtuk buére jóäraata boobíchaihuiy, óusi nahuakamta. Íkai éntok Dios ä jünaktek, entok ä yáuhuak.

<sup>11</sup>Diostat éehuä béchïbo jü Sara kaa äasoaka, úttiäraata mabetak ára ä asoanakë béchïbo. Huanäi asoak jamyölataka junne, bueïtuk ä súsualek, juka nokta asoanakee,

ti áu jíayhuakamta. <sup>12</sup>Íari béchïbo kétchi, huépülak abe mukemtabechi juebénakam át yeu sájjak, téekapo chókim bënasi, entok juka sèeta bahue mayoat óreka kara näikiahuamta bënasi.

<sup>13</sup>Dios huáatihuä pámani, ímëi simetakam kókkok, juka bem mabetnakëu kee jee mabetaka. Të kíalim mékkariat am bíchaka am súsualeka am tebotuak. Entokim nokaka ínel jiaahua: “Katte ímí joome, entokte kia buía ániat kaate.” <sup>14</sup>Bueïtuk jume íneli jíame, huittim yore jüneetua, täbui naciónta emo jariähui.

<sup>15</sup>Bueïtuk bempo hua buíarat bem yeu sájakäbet éätek, lütüriapom tiempota jípurey áman bem nótti béchïbo. <sup>16</sup>Të bempo chë türík jípu péiyay, téhuekapo. Íari béchïbo Dios kaa ámey tihueka ámeu áu Dios tíiya, bueïtuk buere jóäraata am yáariak.

<sup>17</sup>Dios éehuä béchïbo, Abraham jübilahuak Isaacta më íaahuaka Diostau bíchaa ä näikiahuäpo. Íneli jü ä máknäu mabetnakeme huépülak jíba üuseka Diostau bíchaa ä näikiaka áahuä tójjak.

<sup>18</sup>Íneli téjhuaritukay: “Isaacta betanë nat tómti kat-riam jípunake.” <sup>19</sup>Jüneyiy Diosta



(Hebreos 11:19)

úttiata jípurèhui, jume kókkolam násuk jábeta ä tóbnoktianakë béchïbo. Ä ínèlipo, ä üusihua áapo júchi mabetak.

<sup>20</sup>Dios éehuä béchïbo, Isaac Diosta tühua aahuak, chúkula símeku ámeu ayunakemta, Jacobta entok Esáuta béchïbo.

<sup>21</sup>Dios éehuä béchïbo Jacob, muk báreka, Joséta üusim hueuhuëpulam béchïbo Diosta tühua aahuak. Huanäi Diostau rúkteka ä yörek, ä boroonia puntat huíjjüteka. <sup>22</sup>José muk báreka am téjhuak, jume israelita usiarim yeu sákanakèhui, entok nésahuek ä takaa ótam bétana.

<sup>23</sup>Ä áchayim Dios éehuä béchïbo báij metpo Moiséjtam éssok, bueituk musála machisim ä bitchay, entokim reyta kutti noki kaa májhuek. <sup>24</sup>Dios éehuä béchïbo Moisés, béja yótaka kaa entok reyta mala asoapo áu náikia iak. <sup>25</sup>Áapo íkái yeu púuhuak, jü Diosta gentemak jiokot ä bínnähui, bueituk jum kaa türiku chúbala al-leaka náasä huéenakeu, síimeta tójjak. <sup>26</sup>Jü Cristotamak jiokot anhuame símek béppa ríkoapo ä jípurek, jum Egiptopo tómi tesorota béppa, bueituk juka ä yönakeu bitchay. <sup>27</sup>Diostat éehuä béchïbo Egiptota tö siika, juka reyta ómtira kaa májhueka. Ínèli áu jípurek, juka kara bít-huamta bíchamta bénasi.

<sup>28</sup>Dios éehuä béchïbo pájkuata yáuhuak, entok juka ójbo sítiahuamta, jü kësam usiarim súame bempörim kaa am táktianakë béchïbo. <sup>29</sup>Dios éehuä béchïbo Bahue Síkiri pámanim

yeu sájjak, buía huakiapo bénasi. Jume egipciom két ánèli ayu báreka, báapom kókkok.

<sup>30</sup>Dios éehuä béchïbo jume Jericó pueblopo sami kóräim huáttek, guoy búsan táapo kontiriáhuaka. <sup>31</sup>Dios éehuä béchïbo Rahab júyapo yorememmak boböyeme kaa ámemak muukuk, jume Diosta nésauri kaa yáakammaki, jume áman bíttuarim yánti ä mabetakä béchïbo.

<sup>32</sup>Entok, ¿jítasune két noknake jáni? Bueituk jü tiempo inou binake, Gedeónta bétana ettejjoa béchïbo, Barac, Sansón, Jefté, David, Samuel, entok profetam bétana. <sup>33</sup>Ímèri Dios éehuä béchïbo reyesim buiäramim úttiapo nüuka, entokim lútula huémta yáuhuak, Diosta am mák rókakáhuim jájamek, entokim yóokom tem páttiak.

<sup>34</sup>Táij béete rúpaktemtam tuuchak; ejpara buahuim ayukäpom yeu sájjak; úttiäraata kaa ayukäpom úttiäraata yeu huíkkek; nássuahuäpom úttiata nüuka; entokim kaa áma joome batallón sontarom tennituak.

<sup>35</sup>Jume jáamuchim bem kókkolam jíabitekame mabetak.

Huate éntok kókosi jiokot johuaka junne, búttia báahuakam kaa báarek, juka chë türi kókkoka jíabitehuamta mabet báreka.

<sup>36</sup>Huate kaa huáatihuaka tiusi jiokot yáuhuak, entokim benmuchahuak, entokim pereesotehuaka cárcelpo jóahuak.

<sup>37</sup>Tétammeyim mamaasuhuak; bem takaa éntok nasukaman

chúktiahuak serruchommeyi; bem  
jiopnakē béchibom jöbilahuak;  
ejpara buahuimmeyim súahuak.  
Yünim naa sájjak, kabara  
entok chiva béhuam sánkoka,  
poloobemtaka, kökosi sirok  
éaka, jájana kaa tüisi bít-huaka.  
<sup>38</sup>Katim ímī ániapo jíapsi  
iaahuaka bít-huay. Mékka ánia  
see päriapom naa kaatey, júya  
ániachi. Káu guójöku entok buía  
guójökum jójjoasuk. <sup>39</sup>Ímēi  
símetaka, akim ä jájamek jöbe,  
juka tüisi bem jíapsähui. Tē  
Dios éehuäpo katim ä mabetak,  
juka bem mák báahuaka nok-ri.  
<sup>40</sup>Bueituk Dios huaka chē türik ito  
béchībo yáuhuak, kaa bempolaim  
jíba yúmalasi emo jípu iaaka, ál-la  
ítapote két ámemak näikiahuak.

### *Jesústate jíba bínnake*

**12** <sup>1</sup>Ánēli kétchi, ítapo  
ito chíkola juebénaka  
Diostat jíapsekame itom bíchame  
jípureka, juka kaa türik entok  
béttesi machik itom kom  
tábemtate tóijnake; entokte  
yánti éaka tenninake, juka böot  
tennihuamta ítopat jípureka,  
<sup>2</sup>Jesústa jíba bíchaka. Bueituk  
Áapo Dios éehuamta yáala, entok  
yúmalasi ä tahuariala. Entok  
Áapo al-leehuamta áapat jípureka,  
kúrusit jìokot aayuk, tiusi jájana  
bít-huaka junne. Huanäi én rey  
bankot katted Diosta báta bétana.  
<sup>3</sup>Bueituk áachem emo temaje,  
jü Áaporikúu sikamtahui, jáchin  
jume kaa türik joame ä bėj-reka  
jáptek, bueitukem jum enchim  
át éäpo kaa huátti báanake,  
lótteka. <sup>4</sup>Bueituk emēe katem jee

kókkko, juka kaa türik bėj-reka  
enchim nássuäpo. <sup>5</sup>¿Jachem ä  
kóptiasula bėjja, juka kutti nokta?  
Bueituk enchim üusekam ténasi  
enchimneu nooka, ínel jíaka:

In üusi, katē kia kaitäpo ä bít  
báare,

juka Señorta kuttílasí enchi  
majtiayo,

éntoke kaa kóm ée báare, kutti  
nokta emou ä nokayo.

<sup>6</sup>Bueituk jü Señor ä nákéu  
kuttílasí majtia,

entok ä bébeba, juka usiapo ä  
mabetakähui.

<sup>7</sup>Emēe juka kutti yore  
majtiahuamta ára mabetátek,  
Dios enchim üusekam ténasi  
enchim bitcha. Bueituk,  
¿jábese jü usiari ä áchay  
bétana kutti yore majtiahuamta  
kaa mákhuame? <sup>8</sup>Tē emēe  
kaa kutti majtiahuakatek,  
katem ára usiaripo näikiahua,  
bueituk símetakam kutti yore  
majtiahuamta mámak-hua.

<sup>9</sup>Täbuiasi ä bít-huäpo, ímī  
buíapote itom áchayim jípurey,  
kuttílasí itom mamajtíame,  
entokte am yörey. ¿Jachute kaa  
chē júne ä jopo yúmala, juka  
téhuekapo itom áchay nésauri,  
itom jíapsinakē béchībo?

<sup>10</sup>Lútüriapo huámēri kaa jaiki  
táapo kuttílasim itom mamajtiay,  
bempörim ä türei pámani; tē ìri  
símeta itou türinakē béchībo,  
bueituk áamak huépülsi itom  
jíapsi iaaka. <sup>11</sup>Lútüriapo jü kutti  
yore majtiahuame yorehuä johuay,  
juka kaa al-leehuamta entok  
sirokhuamta; tē ál-la chúkula  
yánti lútula éehuamta huéria,

huame kuttílasi áma huam  
sákalame béchïbo.

*Jinhua maachi Jü Diosta nok  
jiahui kaa jobahuame*

<sup>12</sup>Huäri béchïbo, jume mámam  
kón huéchilamem tóboktia,  
entok jume tónom karaktilame.

<sup>13</sup>Éntokem ili böom rúttuktia,  
enchim guókim béchïbo, bueituk  
jü guók rábiktilame kaa böot  
yeu huénake, ál-la türilataka  
tahuanake.

<sup>14</sup>Yánti éehuamtem jípure,  
entok huépülsi jíapsihuamta.  
Júnëlem simemmak kaate,  
bueituk íkái kaa jípureme kaibu  
Diosta bínnake. <sup>15</sup>Tüisem át  
suhua, kolopti jábe kaa ä  
jájamnake, juka Diosta tühua.  
Diosta nésahui kaa ä yáakä  
béchïbo, ä jíápsipo chibu éehuame  
át ayu táyтинake. Huanäi iri böota  
ä páttiria báanake. Íäri béchïbo  
éntok, juebénakam juénakuu  
emo nasontenake. <sup>16</sup>Kaabe jak  
enchim násuk annake, jámutta  
kaa jubeka áamak jíápsaka,  
ö juka Diosta bétana yörisi  
machik kaa yöreka, Esáuta ayuka  
bénasi. Bueituk huépul puraato  
buáhuamta béchïbo, juka ä késam  
usiari áttiarita nénkak. <sup>17</sup>Béjem  
ä jüneria, chúkula Diosta tühua  
mabet péaka, kaa jehuitariahuak.  
Huanäi ínëli kaa ä jájamek, juka  
jíapsi kuaktihuamta, buanaka ä  
jariaka junne.

<sup>18</sup>Bueituk katem jü káhui ára  
át mámtahuamtau rúktilla. Íri  
éntok táijpo bétey, tüisi kaa  
machika kut huathuattëpo entok  
buére jekäpo. <sup>19</sup>Huanäi trompeeta

jíahui jíkkajituk, entok jíahui  
nokame. Jume ä jíkkajakame  
éntok jiokot jiaahuay, kaa éntok  
ámeu nok íaaka. <sup>20</sup>Juka nésauta  
bem jíkkajáhuim kara yánti éaka  
mabetay: “Bueituk jita animal  
júyat jálojtekätek tétammey ö  
kúta buahuimmeyi mamaasunay.”  
<sup>21</sup>Buéresi jínhua machiakay jü  
bít-huame; íäri béchïbo jü Moisés  
ínel jiaahuak: “Guómtilatakane  
ino yoohua.”

<sup>22</sup>Eme éntokem áu rúktilla,  
jü káhui Sióntahui, jü Dios  
jíápsamta buére jóarähui,  
téhuekapo jóära Jerusaléntahui,  
entok jume ángelesim juebena  
mílimtaka emo jáläekammehui,  
<sup>23</sup>huame késam usiarim emo  
náu totoijhuäpo náu animmehui,  
bem téhuam éntok téhuekapo  
jiojteri, entok Dios simemmeu  
Jueztahui, entok lútula huëpo  
espíritummehui, jume yúmalasi  
yáarimmehui, <sup>24</sup>entok Jesústahui,  
juka bemela nokta náu  
tütehuakapo násuk huéekamtahui,  
entok jü ójbo sítitahui; iri éntok  
chë tüisi nooka, jü Abelta ójbo  
béppa.

<sup>25</sup>Tüisem át suhua, kaa ä  
omoute béchïbo, juka nokamta.  
Huámëi júnakoy buíapo bétte  
nokta ámeu nokhuakamta,  
katim ä mabetak; karam ä  
guójaniaka taahuak. Ítapo këtchi,  
kaa ä mabetakäteko, juka kutti  
nokta téhueka bétana huémta.  
<sup>26</sup>Júnakoy huäri nok jíahui  
këtchi buíata áu yoyootuak, të  
ëni nokta chúpa rókaka nok-la,  
ínel jíaka: “Ketunene séjtul  
huëpo, áu ä yoyootuanake, të kaa

buíata jíbba, ál-la juka téhuekata kétchi.” <sup>27</sup>Íri nooki, “ketune séjtul huëpo huéeme”, ínel jiau báare: jü yáataka ára sékána órehuame mékka órena, bueítuk juka kara sékána órehuamta áma tahuanaké béchíbo. <sup>28</sup>Inélite juka rey nésauta johuäpo kara sékána órehuamta mabet-lataka, atä baysaunake, entokte íkái itom jípurë násuk, ä nésahui joaka Diostate al-leetuanake, ä yórihuäpo suamsi ito nüyeka. <sup>29</sup>Bueítuk itom Dios tájji jü jita lülütíame.

*Cristota éä páman jíapsihuame*

**13** <sup>1</sup>Emóem nákeka jíba náu aane, náu huéerim bénasi. <sup>2</sup>Katem áabia kópte, jü enchim jóapo jábeta mabet-huäpo, bueítuk huate kaa jünéaka bem jóapom ángelesim mabetak.

<sup>3</sup>Jume peresommehuem huáate, ámemak peresomtuka bénasi, entok jume jiokot bít-huame, eme két enchim takaapo ámemak ä ínnëam ténasi.

<sup>4</sup>Símemmet huéchiapo bíttunake, jü emo jubiahuame; íkái éntokem türi páman jíba ä huéria báare; té kaa emo jubeka entok kaa emo kunaka náu jíapsihuame, Diosta bíchápo yäura bít-huamtam jípunake.

<sup>5</sup>Jum jita jípu péehuäpo katem kaa náksi jita jípu péiya; juka én enchim jípurëmakem al-leiya, bueítuk Áapo ínel jiaahuak: “Kaibune enchi tö simnake, entokne kaa enchi tóijnake.”

<sup>6</sup>Inélite huitti éaka ára ínel jiaahua: Jü Señor ára nee ania; kaibune máujnake,

juka yoremta jita inou yáanakey junne.

<sup>7</sup>Enchim pajtorimmehuem huáate, juka Diosta noki enchimneu nokakammehui. Ámechem suuhua, jáchin bem tahuanakéhui, jum naa kújakteka jáchin bem jíápsäpo. Huanärem jum bem Dios éä páman jíápsa.

<sup>8</sup>Jesucristo jíba ájária, tuuka, éni, entok jíbapo béchíbo. <sup>9</sup>Katem täbuiasi jájaana emo majtiahuäu bíchaa emo huériutebo báare, kaita huitti täyahuä pámani. Bueítuk türi, juka jíapsita Diosta tühuapo kutti yéchahuäpo, té kaa juka buähuamta bétana yore majtiahuäpo; bueítuk ímíri kaabetau tüisi siika, jume íkái yáakammehui.

<sup>10</sup>Huépul altartate jípure; ímíri karam itomak ára áma jíbuä, jume tabernáculopo oficio tékilta joame.

<sup>11</sup>Bueítuk jü sumo sacerdote animaalim ójbo huériaka jume Dios bejrim yáarim béchíbo, áman kikkibake jum símek béppa santosi täyahuähui. Huanäi ímëi animaalim takaahuam, päkunim yeu tóijhuaka táттаahua. <sup>12</sup>Íneli kétchi Jesús, ä ójboy juka pueblota santosi tahuaria báreka, puertapo päkun kókosi jiokot ansuk.

<sup>13</sup>Campamentopote päkun áu yeu kannake, jiokot ä bít-huäu huériaka. <sup>14</sup>Bueítuk ímíte yü tutti buére jóarata kaa jípure; ál-late huaka chúkula boobit-huamta jaria. <sup>15</sup>Inélite Diosta béchíbo jíba ä jo báanake, Áapörik huämi. Áa béchíbo näikiatate buiknake, itom tempo yeu huémnta, entokte ä téhuam huatem jünériatuanake.



(Hebreos 13:20)

<sup>16</sup>Tühua johuame entok jü kaa chúkteka emo aniahuame, katem ä kóptia; bueituk juka kaa emo ámpoleka jíapsihumta, Dios ä türe.

<sup>17</sup>Jume enchim pajtorim nésauritem johua, éntokem áme bétuk emo nüye; bueituk bempom jáchin enchim jíapsäu suaya, entokim Diosta bíchäpo yeu jábuana, enchim béchibo. Inëlim al-leaka ä jonake, kaitat jáchin éaka. Bueituk kaa ä ínëlituk éntok, enchim béchibo júne kaa türinake.

<sup>18</sup>Ito bechibem Diostau nooka; bueitukte huitti éiya, Diosta bíchäpo tüisi ito jíapsähui. Itom naa kújaktépote simeta tüisi jo báare. <sup>19</sup>Entokne júchi enchimneu ä aahua, ínëli enchim ä yáa sáhueka, bueituk juka enchimneu ín nóttinakeu läuti ä yáatunakë béchibo.

**Ä chúpëpo Diosta tühua,  
entok teboterim**

<sup>20</sup>Jü yanti éehuäpo Dios kókkolam násuk ä jíabitetuak,

juka itom Señor Jesucristota. Iri jü kabarammeu buére pastor, entok ä ójboyi jü noki náu tütehuak, jíbapo béchibo. <sup>21</sup>Én éntok Dios áma enchim yúmatuanake, síme tühuata entok ä nésahui johuäpo. Jesucristota nésahuekápáman türihuamta enchimmet yáanake. Jü símek béppa uyjori éntok áa béchibotunake, síme huasu-huasuktiriammechi. Júnentunake.

<sup>22</sup>Enchimmeune ujbuanna, ín hermaanom, juka kutti nokta kaa enchim kom étuanakë béchibo; bueituk íkäine kaa jaikik enchimneu jíojte. <sup>23</sup>Enchimne júnee íaa, jü itom hermaano Timoteo béja kaa cárcelpo káttek. Áapörík läuti yepsak, áamakne áman enchim bínnake.

<sup>24</sup>Jume enchim pajtorimem símem tebotua, entok símem jume santosi jíápsame. Jume Italiapo joome enchim tebotua.

<sup>25</sup>Jü Diosta tü eäu enchim béchibotunake. Júnentunake.